

JUUD

Wargahng Agweed Juude

Rob Ke Nying Warga

Warga gihn agweed Juude ne toohn nyoge ubahngge rog gen be thoohr gene batien yaa puohny ucahb e tahr ngo kejea ge beehda jo yiiho. Juud cwiwny yaa kwaan warga gihn ni aciihme "Beere ge ubuohj ke nying muuny naa acub Juoge yihr joe ne cielo cog ubeehde ne naang." Warga gihn ni ciehg, gihn ne yea room kaa gihn agweed yi riown wargahng Piihter.

Kaa Acaan Luube

Lum umodho 1-2

Ka beehd yaa ucahbe kii ngo giih puohny gene kedea ka uguud wudh gene 3-16

Mag cwiwny ke nying lum Juog 17-23

Leej Juog 24-25

1 ¹ A Juud ge beehda ubaahng Jeacuu Kriihjto kedea a ge beehda umiuh Jeamiij ni, an ne gweehdo yihru wu yaa acuohn kedea unhyaar Juog Wuure wun kedea wu ge yi cing Kriihjto.

² Beehn Juoge duue cwiwny caahn rogu keter kedea cube doohr gihre me duohng yihru maa nhyare wun keraahyo.

Adhemuohm Tiihy Yaa Akweer Ke Juog

³ Goma maa anhyaara! Keehd maa ayuohd cwiwny ne gweed yihru ke nying boadh wahy ge nywaago, e ngo abeehn yi cwiwny ne gweed yihru ne rob ngo yihru teeg mee kejea cuungu teeg mee batien adiehj yiiho gihn acub Juoge ne cielo yihr joe ubeehde ne naang. ⁴ Bang gihn nud keehd nyoge me kitaab Juog anaa arubo coon umodho ke nying ukimh gihn ubeehn gen ne yoado. Yaa nu rog gen abeehn gene ne mad kiinu ke dhe yooh me kwihj. Ge nyoge me kwihy Juog, nyoge me cood yi gihn arob ke nying muuny Juog. Gihn arob yi ngo cood gene coodo beere dhe yooh yoad gene yoado me tiihy gene giih bal kedea giih cwaahne ne yoad dhe yooh me kweer gene keehd Jeacuu Kriihjto ge ngad puohnyo kedea Ruohdho.

⁵ Keehd me ngahyu, giih ni e a daahd ucahga gen ke bero yihru, kejea Juog joe ge anaa abeehne ne kahl oogo yi bahng gihr Micihra abea batien gihn nu e jo kuu anaa ayiih lume kiin gen ge anaa abeehne ne naah. ⁶ Kedea wudhu kea wul rih gihn anaa atiihy ree rog wuohdjuog giih kuu anaa amag ruohdh acub gen yea beer mee ge anaa a'aay oogo yihdh miehy gen. Ngahda ge anaa abeehn Juoge ne tuhyo ke gele me be padh oogo kedea ukedhe gen ka me yea ne muudho bang ne koar cahng ukimh gihn duohng! ⁷ Kedea ke dhe yoohn nu acielo nu, e ne neehn gihn anaa atiihy Juoge rog geedh Codom maa Gomoarah kedea geedhe giih cahng keehd gen. Yaa geedh nu rog gen anaa abeehn gene ne yugo ne yaa mahj kedea ne nyoge me nhyar yug giih cwaahne. Giih nu cang, ge naa giih nyoadh Juoge nying yaa yoad ukimh gihr paar maaj me guge tooro.

⁸ Yaa ni ruba ke nying gen ge nyoge me par ke diihde me ge ne cag gen. Ge nyoge me adhemuohm gihn yug ngaan ngo yuge ke ree. Ge ukweer ke lihng lum ruohdh ne nyum gen kedea udhahl gene giih kuow yi maalo. ⁹ Maaykel ge anahg ruohdh wuohdjuog, naa anaa apeeem gene keehd atiihb ukeehg ke nying kuohm Moaje, e kare tooro yihre maa adhahle kuohm atiihb ukeehg uyienye ngo abea arobe yihr ngo kea, "Yih ukimh Juoge." ¹⁰ Abea mar yaa ni ge piih ne yieny kwaad gihn me yea ngo be dead gene. Kaano e yaa kwihy Juog ge ukimh Juoge ke nying ge tiihyo kaa dhe yoohn tiihy laahy kii ngo e yea toor par.

¹¹ Ge nii gihn me raaj ne waany bang gihn dhe yoohn akwany gene beehda dhe yoohn anaa akwany Kaayne ge amag tiele unahge umen. Ge nii gihn me raaj bang gihn ge awaahj upahdh gene yi tiihy Balaam ngaa ameehg nyoge yug giih adhemuohm ke nying giih lonyo. Yaa nu lum Juog adhahl gene kedea upaahr gene oogo rih ngo wa mar Koara ge apaahr oogo rih Moaje. Ke nying gihn nu e ge ukimh Juoge.

¹² Yaa ni ge nyoge me par giih me reje kedea ke dhe yoohn giih laahy wihj giih ge noono tiihy gene maa wahy cam gihr gen ge naa dhog yiehdh jwaahg gene caame giih camu tiehd keehd gen. Gihn me yoad gene tooro bang gihn ge neehn poohl me kool yame kii maalo abea be cwii, kedea ge neehn yen me booge alwaar oogo rog gen utwaahg gen utoor ka me nyuol gene ke nyethen. ¹³ Giih tiihy gene ge maahn ke robo kedea ge reje ke lihngo wa giih reje ge kahl athewo me teeg maa atihng ree yi naam uwiie gen wiih agala. Ciehg agag oogo yi yoohne, ngo beehda ciehiro maa akimh Juoge ne ci ne pahdho ka maa muudho. Yaa ni ge ne room ke ciehu nu.

¹⁴ Anaa nahg Enog, ge abecien kware giih abeehno ke batien Adam e naa acaar gihn utiihy ree rog yaa ni naa arube kea, "Maahnyu! Ruohdh e noon beehn keehd amahr wuohdjuog giihe me thoohdh mee ge rog gen toor anyoohne ¹⁵ ne yug lug ke nying kwaad giih ayug nyoge cang kedea ne kihm gen cang ke nying giih reje naa yug gene kedea ke nying kwaad luub reje ge arob gene rih ruohdh." ¹⁶ Jo ni ge yaa angiiro kedea ge yaa cej piny ne yoad awuohj rih ngaa moogo, ge nyoge me tiihy kwaad giih me reje ge yuohd cwiwny gene rog gen. Kedea ge yaa nyaahm maa nyoge mooge wudh gen weng gene ke oogo ke dhe yoohn puohny gen bang uyoad gene kwaad gihn daahd gene, bang yaa nu.

Magu Cwihnyu Ke Nying Lum Juog

¹⁷ Abea wu jo'a maa anhyaara! Wudhu keá wul rih gihn anaa arob yaa oohr giih Ruohdho Jeacuu Kriihjto yihru kejea ree utiihye cahng moogo. ¹⁸ Ngo anaa rob gene yihru kob gene, "Yihdh nihn gug piny nud ke nyoge muu ubeehn ungier gene giih puohnyu ke nying lum Juog kedea ge unahg nyoge me tiihy giih me reje ge ayuohd cwihny gene rog gen." ¹⁹ Jo nu ge ne meehg yihdhu paah kedea ge nyoge me tiihyo ke dhe yooh me par me thiin toor yea noono e ge yug kwaad giih daahd koohm gene kedea ke nying gihn nu e Wahy Juog tooro rog gen.

²⁰ Abea wu goma maa anhyaara, doongu yi yiiho gihru noono yea tooro anyoohne beer mee kedea kwahyu ke dhe yoohn Wahy Juog. ²¹ Beehdu ke dhe yoohn nhyahro gihr Juog wa kaano koaru boadh wahy gihn ukahl Ruohdho Jeacuu Kriihjto yihru beere kuowo me guge tooro yoadu yoado. ²² Duogu cwihnyu caahn rog yaa yiiho gihr gen poohd yea yoohd beere yiiho gihr gen unieng. ²³ Lwahgu kwaad ngaa daahd uboadhe wahye wa wu kony dhaano me nii maaj. Thiow, ke lwahr yi cwihnyu, duu cwihnyu caahn rih kwaad ngaa daahda uduu cwihnyu caahn ree. Abea keehd waay yaa apahdh yi giih nyooro ke dhe yoohn giih reje naa tiihy gene, e kea maanu gen.

Leej Juog

²⁴ Leeyu Juog ge meehg wun mag yiiho gihru beer mee kedea ge kedh wun nyume kaa amoar wiihe yea keehd med cwihny e adhemuohm me ne rogu tooro. ²⁵ Leeyu Juog ge e naa Juog e keede cog kedea e naa Ngad Boadh won. Leej kedea wuohdo maa teeo ge beehda giie ke nying Jeacuu Kriihjto Ruohdho, ge duohng nyum giih acag cang awaahn kedea uwahdhe cahng gug piny. E noono.